

U ovom broju, između ostalog, čitajte:

- **UPFBiH poziva zastupnike i delegate PFBiH da podrže i usvoje finansijske i radno-pravne zakone**
- **Nastavak agonije na tržištu rada u FBiH**
- **Poslodavci traže hitnu akciju vlasti i konačno rješavanje problema rada i boravka profesionalnih vozača na području Europske unije**
- **Održana tematska sjednica ESV-a FBiH o izmjenama Zakona o zdravstvenom osiguranju sa posebnim osvrtom na bolovanje**
- **Rukovodstvo UPFBiH na sastanku u vezi tržišta nafte i snabdijevanja naftom i naftnim derivatima**
- **Konsultacije poslovnih udruženja i komora sa EU diplomatama**



UPFBiH poziva zastupnike i delegate PFBiH da podrže i usvoje finansijske i radno-pravne zakone



Udruženje poslodavaca u Federaciji BiH poziva zastupnike i delegate Parlamenta Federacije BiH da na predstojećim zasjedanjima podrže i usvoje set ključnih finansijskih i zakona iz oblasti rada i zapošljavanja koji predstavljaju ključne propise iz reformskih paketa u narednom periodu.

Na dnevnom redu Zastupničkog doma 11. i 12. marta, između ostalog, nalaze se i prijedlozi zakona iz oblasti bankarstva, platnih usluga, elektronskog novca, mikrokreditnog sektora, zaštite korisnika finansijskih usluga i računa za plaćanje, koji su predloženi po hitnom postupku. Usvajanje seta ovih zakona predstavlja važan korak ka modernizaciji finansijskog sistema Federacije BiH, jačanju sigurnosti i transparentnosti platnog prometa, ubrzanje digitalizacije te dalje usklađivanje sa praksama Evropske unije.

Poseban značaj ovog paketa ogleda se u činjenici da je on dio reformskog paketa, odnosno preduslov ka integraciji Bosne i Hercegovine u Jedinствeno evropsko platno područje (SEPA). Pristupanje SEPA-i omogućilo bi jednostavnije, brže i jeftinije prekogranične platne transakcije sa državama Evropske unije, što bi donijelo značajne koristi za privredu kroz smanjenje troškova međunarodnih plaćanja, efikasnije poslovanje kompanija i veću konkurentnost domaće ekonomije na evropskom tržištu. Riječ je o reformama koje direktno utiču na poslovno okruženje, dostupnost finansijskih usluga i povjerenje investitora, jer stabilan, savremen i regulatorno usklađen finansijski sistem predstavlja jedan od temelja održivog ekonomskog rasta. Istovremeno, ova finansijska reforma, sigurno je, doprinijet će povjerenju

međunarodnih organizacija i institucija prema privrednicima iz Bosne i Hercegovine, a značajno će utjecati i na izbjegavanje uvrštavanja BiH sivu listu Moneyval-a, što bi bilo zaista pogubno posebno za vanjskotrgovinsko poslovanje bh. kompanija.

Na sjednici će se raspravljati i o izmjenama i dopunama Zakona o zapošljavanju stranaca te novom Zakonu o posredovanju u zapošljavanju i socijalnoj sigurnosti nezaposlenih osoba, koji imaju poseban značaj u trenutku kada se privreda suočava s ozbiljnim nedostatkom radne snage, zbog čega je unapređenje zakonodavnog okvira u oblasti tržišta rada ključno za očuvanje investicija, realizaciju ugovorenih poslova i dalji razvoj domaće ekonomije, uz istovremeno očuvanje socijalne sigurnosti nezaposlenih osoba. Ovi zakoni unaprijedili bi proces posredovanja u zapošljavanju, razdvajanje evidencija aktivnih tražilaca posla od osoba koje su na evidencijama zbog zdravstvenog i socijalnog osiguranja, smanjili bi sivo tržište rada i radne snage te omogućili da u legalnim, transparentnim procedurama funkcionira zapošljavanje stranih radnika u situacijama kada na domaćem tržištu nema dovoljno radne snage za obavljanje pojedinih poslova.

Udruženje poslodavaca u Federaciji BiH je u više navrata ukazivalo na potrebu sistemskih reformi, kako u oblasti finansijskog sektora, tako i tržišta rada. Usvajanje ovih zakona predstavlja konkretan korak ka stabilnijem poslovnom okruženju, snažnijoj privredi i ubrzanju europskih integracija dok propuštanje ove prilike predstavlja evidentno odgađanje donošenja ovih zakona na duži i neizvjestan period i stagnaciju tržišta rada i radne snage te nastavak procesa angažiranja naših radnika na tržištu EU i generalno iseljavanja radnika i stanovništva iz Bosne i Hercegovine.

Obzirom da su ovi zakoni usaglašeni od strane svih socijalnih partnera, pozivamo zastupnike i delagte da pokažu opredijeljenost za reforme te da podrže usvajanje predloženih zakona u interesu razvoja Federacije BiH, poslovne zajednice i standarda građana.

Na sjednici Zastupničkog doma Parlamenta FBiH usvojene izmjene Zakona o zapošljavanju stranaca

Na sjednici Zastupničkog doma Federalnog parlamenta, održanoj 12.03.2026. godine, većinom glasova prihvaćene su izmjene Zakona o zapošljavanju stranaca, kojima se pojednostavljaju procedure za izdavanje radnih dozvola uz zadržavanje prioriteta domaće radne snage.

Time se nastoji odgovoriti na potrebe tržišta rada, posebno u sektorima koji se suočavaju s nedostatkom radne snage.

Zastupnički dom PFBiH usvojio set zakona u oblasti reforme finansijskog i platnog sistema

Zastupnički dom Parlamenta FBiH prihvatio je većinom glasova 12. marta 2026. godine na sjednici set zakona predloženih iz Vlade FBiH čiji je cilj, prema Vladinom obrazloženju, sveobuhvatna i strateška reforma finansijskog i platnog sistema Federacije BiH.

Ovim reformskim paketom Federacija Bosne i Hercegovine postavlja moderan, siguran i europski usklađen pravni okvir za digitalna plaćanja, jačanje zaštite korisnika finansijskih usluga i dugoročnu stabilnost finansijskog sistema, uz stvaranje svih ključnih preduvjeta za pristupanje Bosne i Hercegovine Jedininstvenom području plaćanja u eurima – SEPA.

Reformski paket obuhvata Zakon o platnim uslugama, Zakon o elektroničkom novcu, Zakon o računima za plaćanje, izmjene i dopune Zakona o zaštiti korisnika finansijskih usluga, izmjene i dopune Zakona o bankama te izmjene i dopune Zakona o mikrokreditnim društvima.

Pridruživanje SEPA području plaćanja donosi građanima brža i jeftinija plaćanja, privredi niže troškove poslovanja, a finansijskom sistemu snažniji nadzor i veću stabilnost.

Ovi zakoni su ključni regulatorni preduvjet za pristupanje SEPA području i snažan poticaj ukupnom ekonomskom razvoju.

Prema obrazloženju Vlade FBiH, zakon o platnim uslugama je središnji stub reforme jer prvi put sistemski uređuje savremeni platni promet u Federaciji BiH, otvara tržište za inovacije i nove pružatelje platnih usluga, uz istovremeno postavljanje visokih sigurnosnih standarda i snažnog regulatornog nadzora. Zajedno sa zakonom o elektronskom novcu i zakonom o računima za plaćanje, građanima i privredi osigurava se brža, jeftinija i sigurnija digitalna plaćanja, veća transparentnost naknada i jača pravnu sigurnost.

Izmjenama zakona o bankama, mikrokreditnim društvima i zaštiti korisnika finansijskih usluga osigurava se puna usklađenost cjelokupnog finansijskog sistema s novim pravilima, jača nadzor i dodatno štite prava građana.

Ulazak u SEPA sistem znači konkretne koristi za svakog građanina, svakog poduzetnika i javne institucije. To je europski standard koji se sada gradi i u Federaciji BiH.

Nastavak agonije na tržištu rada u FBiH




Udruženje poslodavaca u FBiH izražava žaljenje zbog ponovno propuštene prilike da se tržište radne snage u FBiH unaprijedi i sistemski uredi donošenjem novog Zakona o posredovanju u zapošljavanju i socijalnoj sigurnosti nezaposlenih osoba.

Zastupnički dom Parlamenta FBiH na jučer održanoj sjednici nije usvojio ovaj zakon na kojem su socijalni partneri, odnosno vlasti, poslodavci i sindikati radili prethodne tri godine, utrošeni ogromni kapaciteti, a Nacrt zakona dobio široku podršku i socijalnih partnera i javnosti. Tokom sjednice nisu se čuli ubjedljivi razlozi za neusvajanje ovog zakona.

Podsjećamo, Zakon je imao za cilj razdvojiti evidencije aktivnih i pasivnih tražitelja posla, unaprijediti nefunkcionalan sistem posredovanja u zapošljavanju te smanjiti sivo tržište rada i ogromne troškove koje sistem ima zbog lošeg upravljanja ovim institutima.

Prilika je propuštena i u odnosu na kantonalne zakone i unapređenje rada kantonalnih službi za zapošljavanje jer je većina kantona čekala donošenje federalnog zakona s ciljem usklađivanja.

Štetu zbog neusvajanja zakona ćemo osjetiti svi, i radnici i poslodavci, ali i vlasti. Službe za zapošljavanje nastavit će sa svojom praksom evidentiranja nezaposlenih umjesto aktivnog zapošljavanja istih.



Broj na evidencijama nezaposlenih u FBiH ostaje na 250.000, ogroman broj na radnika nastavlja istovremeno povlačiti benefite sa službi za zapošljavanje dok privreda i ekonomija vapi za radnom snagom. Sistem i dalje nema kontrolu nad realnim tržištem radne snage, poslodavci nemaju pregled raspoloživih aktivnih tražitelja posla, podržavamo sezonski rad naših radnika u susjednim zemljama umjesto u Bosni i Hercegovini, što sve skupa nanosi veliku štetu investicijama, razvoju i ukupnoj ekonomiji Bosne i Hercegovine.

Vjerujemo da je javnost svjesna da je ovo propuštena prilika najmanje na dodatne dvije godine zbog ukupnih političkih okolnosti.

S druge strane, poslodavci pozdravljaju usvajanje izmjena i dopuna Zakona o zapošljavanju stranaca koji jeste više tehničke prilike, ali svakako će unaprijediti procedure i skratiti rokove za izdavanje radnih dozvola.

Za razliku od neefikasnosti pri razmatranju i usvajanju propisa iz dijela radno-pravnog zakonodavstva, odnosno Zakona o posredovanju u zapošljavanju i socijalnoj sigurnosti nezaposlenih osoba, iz perspektive poslodavaca, važan dio jučerašnje sjednice i aktivnosti zastupnika bio je i donošenje seta finansijskih zakona. Radi se o izuzetnom zakonodavnom iskoraku za poslovanje u FBiH jer usvajanje propisa o bankama, elektronskom novcu, platnim uslugama, računima za plaćanje, zaštiti korisnika finansijskih usluga, deviznom poslovanju, lizingu i drugo značajan su doprinos modernizaciji poslovanja, pristupanju SEPA-i, usklađivanju sa EU standardima, digitalizaciji i smanjenju troškova za privrednike te otvaranju bolje perspective za poslovanje na EU tržištu.

Poslodavci traže hitnu akciju vlasti i konačno rješavanje problema rada i boravka profesionalnih vozača na području Europske unije

Udruženje poslodavaca u Federaciji Bosne i Hercegovine i Unija poslodavaca Republike Srpske upozoravaju da pitanje boravka profesionalnih vozača u zemljama Europske unije sve ozbiljnije ugrožava poslovanje domaćih kompanija. Sve veći broj firmi nije u mogućnosti realizovati ugovorene isporuke prema partnerima u Europskoj uniji, dok su neke kompanije već praktično blokirane zbog nedostatka vozača i raspoloživih transportnih kapaciteta. Naglašavamo da je direktno ugrožena likvidnost kompanija, ugovorene obaveze i izvozni tokovi, ali i stabilnost čitavih sektora koji zavise od međunarodnog transporta.

Iako su pravila Europske unije koja uređuju boravak vozača u državama članica našim vlastima poznate već godinama, nadležne institucije u Bosni i Hercegovini očigledno nisu poduzele neophodne korake kako bi se ispunili preduvjeti koji su u posljednje dvije godine, a posebno u proteklih šest mjeseci, jasno istaknuti kao ključni za rješavanje pitanja rada i boravka profesionalnih vozača u Europskoj uniji.



Predstavnici europske diplomacije sa druge strane jasno poručuju da nije realno očekivati bilo kakva rješenja od Europske unije dok domaće vlasti ne ispune minimum uvjeta koji se od nas traže. U pokušaju rješavanja ovih problema, poslodavci su upućeni na bilateralna rješenja između Bosne i Hercegovine sa državama regiona, što je spor i dugotrajan proces, a štete za privredu se svakodnevno povećavaju, mora se promptno reagirati.

Poslodavci upozoravaju da su kapaciteti omogućeni pravilom 90/180 praktično već iscrpljeni, zbog čega domaće kompanije sve teže realizuju međunarodni transport. Ukoliko nadležne institucije ne preduzmu konkretne akcije na rješavanju ovog problema, 70% ukupne vanjskotrgovinske razmjene Bosne i Hercegovine koja se realizuje dominantno kopnenim putem sa državama članicama Europske unije, bit će ugroženo, što može imati ozbiljne posljedice po ukupnu ekonomiju zemlje.

Poslodavci ističu da su, umjesto da se bave razvojem poslovanja i investicijama, primorani da se aktivno uključe u rješavanje ovog kompleksnog međunarodnog pitanja i gotovo u potpunosti preuzmu komunikaciju s domaćim i međunarodnim institucijama i organizacijama, što ne bi trebala biti uloga privrede.

Udruženje poslodavaca u Federaciji Bosne i Hercegovine i Unija poslodavaca Republike Srpske smatraju da su zahtjevi koji posebno u posljednje vrijeme ističe Konzorcij "Logistika BiH" potpuno opravdani, ali upozoravaju da blokade granica ne predstavljaju rješenje i podsjećaju

da svaka blokada roba i usluga proizvodi višemilionske štete privredi. Međutim, od posljednjih blokada granica nema nikakvog napretka u rješavanju ovih pitanja te poslodavci od nadležnih institucija na državnom i entitetskom nivou zahtijevaju poduzimanje vanrednih mjera i hitnu izradu konkretnog akcionog plana s jasno definisanim aktivnostima i rokovima, te aktivno uključivanje nadležnih institucija u bilateralne razgovore s predstavnicima Vlade Republike Hrvatske i drugih zemalja radi pronalaska hitnih rješenja.

Poslodavci dodatno upozoravaju i na pogoršanje globalne situacije na tržištu nafte i naftnih derivata, što već dovodi do rasta cijena roba i usluga, a posebno zabrinjava mogućnost da bi eventualne nove blokade granica mogle dovesti i do prekida ili blokade prometa naftnih derivata, što bi dodatno usložilo problem.

Udruženje poslodavaca u Federaciji Bosne i Hercegovine i Unija poslodavaca Republike Srpske ponovno pozivaju nadležne institucije da hitno djeluju kako bi se spriječile ozbiljne posljedice po privredu Bosne i Hercegovine i očuvala stabilnost vanjskotrgovinskog poslovanja i privrede generalno.

UPFBiH i UPRS: Rješavanje problema vozača ili donošenje vanrednih mjera



Iako su predstavnici domaćih institucija u proteklim danima intenzivirali aktivnosti, konkretno rješenje za problem boravka profesionalnih vozača iz Bosne i Hercegovine u Europskoj uniji i dalje nije ponuđeno te je izvjesno da će najavljene blokade prevoznika biti i realizovane, zbog čega Udruženje poslodavaca u FBiH i Unija poslodavaca RS-a ponovo upozorava nadležne

institucije i javnost da blokade graničnih prelaza mogu dovesti u pitanje opstanak domaćih kompanija i cjelokupne ekonomije.

Ograničenja s kojima se suočavaju profesionalni vozači već sada ozbiljno narušavaju kontinuitet poslovnih procesa, otežavaju ispunjavanje ugovornih obaveza i usporavaju robne tokove. Takve okolnosti direktno ugrožavaju stabilnost privrednih društava, njihovu pouzdanost na inostranim tržištima, ali i funkcionisanje šireg lanca snabdijevanja.

Nadležne institucije Vijeća ministara Bosne i Hercegovine za sve ove godine nisu ništa uradile na rješanju problema prevoznika. Krajnje je vrijeme da se Vijeće ministara Bosne i Hercegovine ozbiljno uključi u rješanje problema prevoznika i da u dogovoru sa Republikom Hrvatskom u najkraćem roku, najkasnije tokom naredne sedmice riješi probleme stanja na granicama i sprečavanja prolaska robe iz Bosne i Hercegovine prema Europskoj uniji i obrnuto.

Paralelno, tražimo hitno održavanje zajedničkog sastanka predsjedavajuće Vijeća ministara sa predsjednicima entitetskih vlada i predstavnicima poslodavaca i prevoznika na kojem će se ponuditi rješenje za probleme prevoznika ili donijeti odluka o donošenju vanrednih zaštitnih mjera za poslodavce, a u konačnici i vanrednog stanja, kako poslodavci ne bi plaćali penale za neisporučenu robu i kako bi preduzeća koja budu ugrožena ovom situacijom mogla podnijeti zahtjev za odgodu plaćanja kredita. U suprotnom, smatramo sasvim opravdanim blokade nadležnih institucija s ciljem realizacije preuzetih obaveza, jer krivci nisu na granicama nego u institucijama.

Ukoliko nadležne institucije ne postignu rješenje i dogovor sa prevoznicima, ukazujemo na mogućnost da i poslodavci čiji bi rad bio zaustavljen blokiranjem granica, zajedno sa svojim radnicima izađu na ulice. Ako se jednim toleriše blokada granica zbog svojih specifičnih problema onda je isto dozvoljeno i drugima čiji rad i poslovanje bi bilo ugroženo blokadom graničnih prelaza. Naglašavamo da bi nove blokade graničnih prelaza mogle izazvati niz nepredviđenih okolnosti koji mogu ugroziti ne samo funkcionisanje ekonomskog, nego i sistema u cjelini. Isto tako, bitno je naglasiti da su institucije dužne obezbjediti slobodu kretanja ljudi i roba, i da ako ista izostane, stvaraju se uslovi za tužbe poslodavaca prema državi jer jednostavno neko mora i finansijski odgovarati za štete koje nastanu zbog nemogućnosti realizacije poslovnih aktivnosti.

Udruženje poslodavaca Federacije Bosne i Hercegovine i Unija poslodavaca Republike Srpske još jednom naglašavaju nužnost hitnog i sinergijskog djelovanja svih institucija na rješavanju ove problematike i izražavaju spremnost da doprinesu rješenjima koja će obezbjediti stabilnost i izvjesnost poslovanja.

Održana tematska sjednica ESV-a FBiH o izmjenama Zakona o zdravstvenom osiguranju sa posebnim osvrtom na bolovanje



Udruženje poslodavaca u FBiH godinama u okviru ukupnih napora na poboljšanju poslovnog ambijenta insistira na uređenju i doradi pitanja zdravstvenog osiguranja radnika u

FBiH i boljoj kontroli bolovanja odnosno sprečavanja zloupotrebe bolovanja te je na inicijativu Udruženja 03. marta 2026. godine održana tematska sjednica Ekonomsko-socijalnog vijeća za teritoriju FBiH na kojoj su socijalni partneri, odnosno vlast, sindikati i poslodavci razgovarali o ovim pitanjima.

Za vlasti i sindikate u ovom trenutku nisu prihvatljive izmjene i dopune Zakona o zdravstvenom osiguranju zbog očuvanja fondova zdravstvenog osiguranja i drugih administrativno-finansijskih razloga te je dogovoreno da će se o izmjenama i dopunama ovog važnog zakona u narednom periodu nastaviti razgovori u nastojanju da se dođe do rješenja.

Sa druge strane, svi socijalni partneri svjesni su koliko štete u privrednom poslovanju se nanosi zloupotrebama bolovanja te je zaključeno da se u najkraćem roku pristupi rješavanju i poboljšanju ovih pitanja. Poslodavci su na sjednici prezentirali moguće izmjene i dopune Pravilnika o postupku i kriterijima za utvrđivanje privremene spriječenosti za rad osiguranika i u slučaju da se usvoje ovakve izmjene i dopune znatno bi se unaprijedilo stanje, spriječile očigledne zloupotrebe pri izdavanju bolovanja radnicima u FBiH, a istovremeno bi se omogućilo bolji pristup zdravstvenoj zaštiti stvarno bolesnim radnicima čime bi u konačnici trebali biti zadovoljni i vlasti i sindikati i poslodavci.

Data je načelna podrška prezentiranim rješenjima te je zaključeno da će se u okviru uspostavljene radne grupe eksperata u roku od 60 dana pripremiti novi ili doručeni Pravilnik koji bi obuhvatio određene inicijative i rješenja i koji bi Vlada FBiH usvojila nakon njegovog razmatranja na ESV-u.

Rukovodstvo UPFBiH na sastanku u vezi tržišta nafte i snabdijevanja naftom i naftnim derivatima



Kolegij Vlade Federacije Bosne i Hercegovine, premijer Federacije BiH Nermin Nikšić i zamjenici premijera Toni Kraljević i Vojin Mijatović, te resorni federalni ministri Andrijana Katić, Amir Hasičević i Vedran Lakić, 11.03.2026. godine u središtu Vlade Federacije BiH u Sarajevu, održali sastanak sa svim relevantnim akterima u lancu snabdijevanja naftom i naftnim derivatima Federacije Bosne i Hercegovine. Sastanku su prisustvovali i predsjednik Udruženja poslodavaca u FBiH Nihad Imširović i direktor Mario Nenadić, pet najvećih distributera nafte u Federaciji BiH, te predstavnici Operator-Terminali Federacije, Naftni terminalni Federacije, Federalne uprave civilne zaštite, Federalne uprave za inspekcijske poslove, Željeznica Federacije BiH i Ekonomsko-socijalnog vijeća.

Premijer Nikšić je u izjavama za medije održanim nakon ovog sastanka rekao da je zbog poremećaja u snabdijevanju naftom na tržištu povećana potrošnja goriva u Federaciji BiH, ali je zahvaljujući lancu distribucije gorivo dostupno.

- Prije svega se želim zahvalim ključnim i najvećim distributerima nafte i naftnih derivata koji su odazvani na današnji sastanak, ali ne zbog odziva na sastanak, nego zbog činjenica da od kad je nastala ova kriza, zajedno s resornim ministarstvima i Federalnom upravom za inspekcijske poslove, najbliže sarađuju kako bi osigurali urednost i snabdjevenost tržišta u Federaciji BiH. Zajedno smo konstatovali da su zbog terminala i kapaciteta, te regionalnih odluka po kome je ograničen, odnosno zabranjen izvoz iz Republike Srbije, praktično naši

distributeri i naši kapaciteti ključni za snabdjevenost tržišta u cijeloj Bosni i Hercegovini. Ono što je evidentno je to da je zbog poremećaja na tržištu, zbog rata, te zbog očekivanja nestašice, pojačana potrošnja. Sa otprilike 1,7 miliona litara, koliko je dnevna potrošnja u Federaciji bila, porasla na 3,1 miliona, ali je i uprkos tome, zahvaljujući lancu distribucije, osigurano da goriva bude, iako ne možemo baš utjecati na svjetske cijene goriva – rekao je premijer Nikšić.

Dodao je da je cijena goriva u BiH povoljnija nego u drugim zemljama regije, te je kao primjer naveo dolazak građana iz susjednih zemalja u BiH da toče gorivo. Osvrnuo se i na najavljenju blokadu graničnih prelaza.

- Za 23. mart je najavljena nova blokada graničnih prijelaza i ona bi mogla dodatno stvoriti probleme za distribuciju goriva. Tu ključnu ulogu mogu odigrati Željeznice FBiH kako bi snabdijevanje bilo uredno. Distributeri su ukazali na određene probleme s kojima se susreću i dogovorili smo se da inspekcija pokaže razumijevanje za snabdijevanje gorivom. Isto tako smo upoznali distributera kako je Vlada Federacije ispunila sve svoje obaveze u odnosu na zahtjeve Konzorcijuma Logistika i onome što smo imali na Ekonomsko-socijalnom vijeću. Osigurali smo korištenje jednog taga za autoceste u Federaciji i u Republici Srpskoj, te da se federalni tag može koristiti u Republici Hrvatskoj, uputili smo prema Vijeću ministara i za diplomatsku notu koja bi zemlje koje nemaju potpisan ugovor i reciprocitet u odnosu na BiH omogućili povrat PDV-a našim prevoznicima, kao i inicijativu za preraspodijelu akciza - rekao je premijer Nikšić.

Ukazao je i na moguću posljedicu povećanja cijena namirnica usljed rasta cijena nafte, te naglasio da u tom kontekstu važnu ulogu inspekcije, ali i važećih mjera Vlade Federacije BiH koje se odnose na „zaključane cijene“ za 60 osnovnih artikala.

Podsjetio je i da je Vlada Federacije BiH uložila 800.000 KM za ugradnju i postavljanje sonde u svim benzinskim postajama što omogućava praćenje u realnom vremenu stanje kapaciteta na pumpama, a time i cijena.

- Vlada će podržati inicijativu, vidjet ćemo u kojem procentu, da li je to 10 ili 20 posto, privremenog smanjivanja akciza kako bi zajedno sa distributerima podijelila teret osiguravanja snabdjevenosti tržišta. Kao što znate naši distributeri imaju ograničenje kada je u pitanju marža, tako da ne bude sav teret na njima, nego da tu i Vlada pokaže odgovornost i spremnost da podnese dio tereta. To naravno nije na Federalnoj vladi, to će morati da ide na Vijeće ministara – rekao je premijer Nikšić.

Predstavnik i vlasnik Hifa Oil grupacije Izudin Ahmetlić kazao je da svi podjednako snose teret i sudbinu poteškoća u snabdijevanju naftom.

- Mislim da smo odgovorili zadatku i Federaciji BiH nije ostala bez nafte, iako nemamo rafineriju. Naša nesreća je što je u ovom trenutku remont rafinerije u Rijeci u Hrvatskoj, koja uveliko pomaže bh. snabdijevanje. Nema mjesta za paniku koliko god da je stanje složeno - izjavio je Ahmetlić.

Po njegovim riječima, formiranje cijena ne zavisi ni od koga u Federaciji BiH, jer cijene svakodnevno diktira rafinerija u luci Ploče.

- Mi nemamo svoju rafineriju, a ipak uspijevamo imati snabdijevanje gorivom. Cijene nafte rastu i u drugim zemljama Evrope. Ne možemo predvijeti šta će se dešavati s cijenama u narednom periodu. Ako Hormuški tjesnac i dalje ostane zatvoren, bit će teška situacija u cijelom svijetu. Tada treba tražiti nove puteve i alternative - naglasio je Ahmetlić.

Konsultacije poslovnih udruženja i komora sa EU diplomatama



U Delegaciji EU u BiH u Sarajevu, predstavnici Udruženja poslodavaca u FBiH, Unije poslodavaca RS, Vanjskotrgovinske komore BiH i entitetskih privrednih komora informirali su ambasadore i predstavnike DKP mreže europskih zemalja u BiH o ključnim izazovima i prioritetima u poslovnom okruženju u BiH.

Predstavnici poslovne zajednice u BiH zahvalili su šefu Delegacije u BiH Luigiju Soreci i njegovim saradnicima na redovnim prilikama da razgovaraju o važnim temama i prioritetima u BiH te su zahvalili učesnicima sastanka na prilici da nastupaju zajednički u procesu konsultacija oko EU integracija i izazova s tim u vezi.

Kako Bosna i Hercegovina više od 71% svog iznosa ostvaruje na tržištu EU, učesnici sastanka ukazali su na pitanja statusa profesionalnih bh. vozača koji su ovih dana u fokusu privrede i javnosti i insistirali na punom angažmanu s ciljem prevazilaženja ovih objektivnih problema u praksi.



Za privredu u BiH i dalje su ključna pitanja unapređenje fiskalnih propisa, doprinosa i poreza, zdravstvenog osiguranja, ali i pitanja radno-pravnog zakonodavstva, propisa iz oblasti trgovine, krivičnog zakonodavstva i ukidanja parafiskalnih nameta. Važan iskorak desio se prethodnih dana na planu usvajanja reformskog paketa finansijskih zakona kao jedan od preduslova za pristupanju Jedinstvenom plaćanju u eurima (SEPA).

Očekuje se usvajanje i propisa iz oblasti električne energije, kao i Zakona o oduzimanju i upravljanju imovinom i Zakona o ciljanim finansijskim sankcijama za terorizam, finansiranje terorizma i proliferaciju

oružja za masovno uništenje, kao preduslova za nevrštavanje BiH na Moneyval sivu listu.

Također se razgovaralo i o problemima nefunkcionalnih evidencija nezaposlenih i pitanjima sporih procedura za zapošljavanje stranaca u BiH. Predstavnici privrednika govorili su o važnosti implementacije CEFTA sporazuma, pitanjima reindustrijalizacije BiH i potrebi uključivanja privrednika i poslodavaca u predpristupne razgovore i usklađivanje propisa sa EU pravnom stečevinom.

Predstavnici UPFBiH i Association of business service leaders (ABSL) održali sastanak, ABSL pristupio Udruženju



Udruženju poslodavaca u FBiH pristupila je nova kolektivna članica Association of business service leaders (ABSL) te je tim povodom održan sastanak predstavnika Udruženja i ABSL-a na kojem je direktor UPFBiH

Mario Nenadić predstavio Udruženje, nadležnosti i aktivnosti te statutarne i druga rješenja za uključivanja novih članica u punopravno članstvo i funkcionisanje Udruženja.

Predstavnici ABSL-a, direktorica Nadina Gradašćević i članica i direktor NetSolutions-a Jasmin Zulčić, uručili su predstavnicima Udruženja pristupnicu za kolektivno učlanjenje u Udruženje poslodavca čime je Udruženju pristupilo novih 18 kompanija sa oko 4.500 radnika.

Na sastanku je razgovarano i o formiranju nove grupacije pri UPFBiH, odnosno grupacije članica iz sektora poslovnih usluga u Bosni i Hercegovini. Radi se o brzorastućoj grani privrednog poslovanja koja u ovom trenutku iskazuje veliki interes za unapređenje poslovnog okruženja, posebno za specifične djelatnosti koje zastupa i kojoj je neophodan veći broj radnika u veoma kratkom periodu.

Udruženje poslodavaca u FBiH stavlja na raspolaganje novoj članici svoju infrastrukturu, iskustva, poslovne kontakte sa socijalnim partnerima, zajednički nastup prema institucijama vlasti u smislu poboljšanja općih uvjeta poslovanja ali i onih koji su specifični za granu poslovnih usluga u BiH.

Pristupanju Udruženju ABSL osigurao je i pravo na članstvo u pravnim i ekonomskim savjetima, upravljačkim strukturama Udruženja, uslugama povezivanja i svakodnevnog informisanja i partnerstva u pripremi budućih zajedničkih projekata prema domaćim i zajedničkim institucijama.

Sastanak sa predstavnicima Udruženja Autobuskih stanica FBiH



Udruženje poslodavaca u FBiH održalo je sastanak sa Udruženjem Autobuskih stanica FBiH. Na sastanku su, ispred UPFBiH prisustvovali direktor UPFBiH Mario Nenadić, predstavnik Centrotransa Safudin Čenić i sekretarka Mersiha Jusić, a ispred Udruženja Autobuskih stanica FBiH Suada Avdić iz kompanije Avis d.o.o. Gračanica, Ivan Zelenčić, Autobusni kolodvor d.o.o. Mostar i Mustafa Kalesić, Autobusna stanica Živinice.

Sastanak je održan na inicijativu Udruženja Autobuskih stanica FBiH te je zatražena podrška UPFBiH u pokušaju rješavanja pitanja novog cjenovnika i unapređenja uvjeta za rad i funkcionisanje autobuskih stanica u FBiH. Zaključeno je da će UPFBiH obratiti Federalnom ministarstvu prometa i komunikacija s ciljem što skorijeg odobravanja i stupanja na snagu pomenutog cjenovnika jer već godinama važeći ne pokriva troškove poslovanja autobuskih stanica u FBiH.

Nova članica UPFBiH - Murix d.o.o.



Kompanija Murix d.o.o. bavi se uvozom, distribucijom i brendiranjem promotivnog materijala, pomažući firmama svih veličina da efikasno predstave svoj brend. Sa deset godina iskustva, prepoznati su kao pouzdan partner koji nudi kvalitetna rješenja prilagođena svakom klijentu

i ciljevima promocije.

Više o kompaniji pročitajte [OVDJE](#).

Nova članica UPFBiH - Unior Tehna d.o.o. Sarajevo

Unior Tehna je vodeći distributer akumulatorskog i električnog alata, opreme za zavarivanje, ručnog profesionalnog alata te reznih i brusnih materijala.



Kompanija je nastala 1996.

godine a danas ima više od 30 zaposlenih. Asortiman sadrži proizvode najpoznatijih svjetskih i europskih brendova, uključujući Makita, Unior, Lincoln Electric, Praktik Tools, Ryobi, Ridgid, Hugong, Collomix, Klingspor, Rhodius i mnoge druge.

Više o kompaniji pročitajte [OVDJE](#).

Nova članica UPFBiH - Association of business service leaders (ABSL)



Asocijacija biznis servis lidera (ABSL) je vodeća organizacija koja predstavlja sektor poslovnih usluga u Bosni i Hercegovini. Okuplja ugledne kompanije koje posluju kao centri za zajedničke usluge (SSC) pružatelji outsourcinga poslovnih procesa (BPO) outsourcinga informacionih tehnologija (ITO) i istraživanja i razvoja (R&D). Sektor ima ogroman potencijal da pokrene i pozicionira Bosnu i Hercegovinu kao poželjnu nearshore destinaciju obzirom na trenutne poslovne, ekonomske i političke prilike. Uz trenutnu stopu rasta industrija je na putu da postane najveći izvor radnih mjesta u privatnom sektoru u zemlji.

ABSL je jedinstvena organizacija s vizijom izgradnje konkurentne industrije poslovnih usluga i mreže izvrsnosti. ABSL inspiriše, dijeli znanje i povezuje iskustva svojih članova kako bi stvorio bolje okruženje za razvoj industrije.

Više o Asocijaciji pročitajte [OVDJE](#).

Poziv za podršku filmu "Quo Vadis, Aida? – Dio koji nedostaje"




"Quo Vadis, Aida? - Dio koji nedostaje" je novi igrani film Jasmile Žbanić i produkcijske kuće Deblokada iz Sarajeva, članice UPFBiH, te nastavak višestruko nagrađivanog filma "Quo Vadis, Aida?". Radnja filma odvija se u poslijeratnom periodu nakon genocida u Srebrenici i prati Aidu na putu od nade da su joj sinovi živi do konačnog suočavanja s istinom i potrage za pravdom.

Film predstavlja priču o univerzalnoj borbi žene koja, suočena s nezamislivim gubitkom, odbija da šuti, odustane ili prihvati zaborav. Kroz Aidu i druge žene Srebrenice, film govori o ženskoj borbi, snazi zajedništva i potrebi da se, uprkos političkim, institucionalnim i birokratskim preprekama, dođe do istine i pravde.

Iako duboko ukorijenjen u bosanskohercegovačko iskustvo, film se obraća širokoj međunarodnoj publici kroz univerzalne teme gubitka, traume, dostojanstva i života nakon nasilja. Dok je prvi film bio fokusiran na 11. juli 1995. godine, ovaj nastavak bavi se onim što dolazi poslije - mirom koji je često teži od rata.

Udruženje "Društvo umjetnika Deblokada" iz Sarajeva pokreće crowdfunding kampanju za potrebe realizacije igranog filma "Quo Vadis, Aida? - Dio koji nedostaje", bosanskohercegovačkog projekta koji se realizira kao međunarodna europska koprodukcija. Cilj kampanje je da se kroz organizovano javno prikupljanje sredstava zatvori dio lokalnog finansijskog učešća u projektu, odnosno segment budžeta koji nije bilo moguće u potpunosti



osigurati kroz postojeću koprodukcijску i institucionalnu strukturu. Većinski dio budžeta filma osiguran je iz međunarodnih izvora, dok se preostali dio lokalnih troškova zatvara kroz različite oblike podrške, uključujući crowdfunding. Kako je snimanje već počelo, kampanja ima neposredan značaj: prikupljena sredstva omogućit će angažman većeg broja statista u ključnim scenama, čime će film dobiti snažniju, uvjerljiviju i produkcijski bogatiju vizuelnu realizaciju. Kampanja ujedno omogućava građanima, publici, dijaspori i prijateljima filma da direktno podrže nastanak važnog domaćeg filmskog projekta.

Kroz crowdfunding kampanju Udruženje "Društvo umjetnika Deblokada" želi prikupiti preostalih 215.000 KM i time zatvoriti ključni segment lokalnog finansijskog učešća u realizaciji filma. Kampanja je zamišljena kao otvoreni poziv svima koji žele podržati domaći film, rad bosanskohercegovačkih autora i filmskih radnika, te realizaciju projekta koji ima i lokalni i međunarodni značaj.

Dosadašnji rezultat od 135.000 KM potvrđuje da podrška ovom filmu već postoji. Prikupljena sredstva neće služiti samo formalnom zatvaranju budžetske konstrukcije, nego će biti direktno uložena u kvalitet realizacije filma, prije svega kroz angažman većeg broja statista.

Linku za donaciju možete pristupiti [OVDJE](#).



UDRUŽENJE POSLODAVACA

UDRUŽENJE POSLODAVACA U FBiH
MARŠALA TITA 6, 71 000 SARAJEVO

TEL: 00 387 33 552 460

FAX: 00 387 33 552 461

MAIL: info@upfbih.ba

WEB: www.upfbih.ba